

晚晴籜詩匯卷二十五目錄

吳正洽 一首

張天植 二首

王濤 一首

郝浴 三首

劉子壯 四首

熊伯龍 二首

曹本榮 一首

方孝標 六首

柯聳 二首

王廣心 十一首

唐夢賚 五首

顧大申 九首

吳亮中 二首

成亮 一首

王庭 七首

董文驥 十二首

周體觀 二首

周茂源 十五首

鍾明進 一首

張三異 二首

程雲 十一首

謝泰 一首

陳丹赤 一首

趙吉士 四首

姚文烈 一首

謝天樞 一首

戴宏烈 三首

鄒山 一首

宋實穎 三首

邱履程 一首

徐作肅 二首

譚德馨 一首

晚晴移詩匯卷二十五

徐世昌

吳正治字當世號廣庵漢陽人順治己丑進士改庶吉

士授編修官至武英殿大學士加太子太傅諡文僖

詩話文僖敷歷中外爲政持大體爲於內行好汲引後進己未大科以彭羨門名上得首選初未識面也

種竹

退食少塵事疏篁愜遠心門無俗客到時有暮蟬吟密葉
侵階綠幽香入閣深那知炎暑厲移榻就清陰

張天植字次先秀水人順治己丑一甲三名進士授編
修官至兵部侍郎有北游草湖上偶吟

歲暮途中卽事

有雲依北近無雁寄南還野闊孤煙直村虛獨樹閒才名

消歲月窮達半關山從古英雄迹浮沈行路間

望醫無閭山

驅馬遙看古嶽前疏林黯黯下寒煙日銜雙塔傾西向雲
擁羣峯拱北懸地發玉膏開漢土天垂赤簡紀堯年名山
閱盡興亡事鐵馬金戈落照邊

王清字素修一字冰壺號思齋海豐人順治己丑進士
改庶吉士授編修官至吏部侍郎有留餘堂詩藁

南鎮會稽山

稽山遙接越天低宛轉峯巒路欲迷青靄常浮秦望北白
雲卻繞禹陵西卽看修竹含新雨無數蒼松卷碧溪真氣
重重吹不散神靈自合此中棲

郝浴字冰滌又字雪海復自號復陽定州人順治己丑

進士授刑部主事官至廣西巡撫有中山集

詩話雪海巡按四川密陳吳三桂跋扈狀三桂深銜之撫拾保甯城守事誣爲冒功世祖燭其冤從寬流徙盛京三桂反復原官謫居廿載無一日不讀書同戍者贈以詩云祇愁深夜裏凍殺蠹書蟲平生講程朱之學偶事吟詠皆有道氣

弔明蜀撫軍葆一張公

崇明昔邁亂明綱猶未委豈無心膂臣徵兵及蛇豕駕馭甯盡乖天地合瘡痍蜂動翁百蠻流血殷渝水燦燦芙蓉城旦夕將摧圯公持霜斧出椎牛誓介士撻發固有威忠孝亦有理遂令執爨眾感激厲廉恥復城二十七恢地二千里至今溪峒中談公猶繫齒再有邦彥亂永甯盡賊壘公膺節鉞來將卒六千耳殲滅十萬寇迅若掃浮蠧距今三十年蜀運未休否獻逆揚其波羣盜縱橫起強壯膏郊

原老弱委泥滓鱗鱗萬家邑化作榛與蒿晦晦千頃禾鞠
爲稂與秕浴也叱馭人志在遵前軌遺民一何寡交以生
爲累蜀吏一何弱爭以黜爲喜吏民亦人情致此良有以
師行動以萬邑民百十止豈暇事耕耘不足供驅使況復
滇黔間伏莽叢姦宄永甯未遽入渝城師暫已賴有保甯
捷經略從茲始公當明旂衰建豎偉若彼予當清盛初匡
濟僅如此明明忠盡業胡爲遜君子豐碑吹作塵蔓草迷
祠址聊探故老言題詩付青史哀哀巴渝人公在爾不死
同王無煩游石氏祇園

側身雙樹入花氣浣衣裳不道千年雪融成百合香落紅
嫣小築凝翠溼回廊尙有安巢燕呢喃問覺王

金谷分明在相看作化城青山如假寐飛鳥自呼晴花燦

陽春笑松流大壑聲幽情誰復憾况共虎谿行

劉子壯字克猷號稚川黃岡人順治己丑一甲一名進

士授修撰有岷思堂詩集

詩話克猷制舉文雄厚排界凌轍一時惟熊次侯與之頡頏順治己丑聯名上第士論翕然稱得人對策例川儼語克猷始改散體孝陵深賞之惜中道稅駕年僅四十四而卒未得與傅聊城呂武進同膺大受詩以秀逸擅勝與次侯亦正在伯仲間也

送別次侯學士

風靜天高落木悲輕車羸馬望南馳愧深玉署曾聯轡夕照師門憶共危近日文章誰與語別來期許慎相思經過儻遇真英俊莫惜音書報我知

答詹柔尊

醉君江上閣風雨闌然春忽作十年別幾成異世人得書

如面見贈句以情申遙羨湖煙裏能於魚鳥親

秋懷

大河以北近京畿
昨歲荒涼客解衣
疲騎穿城白晝靜
春林巢鳥路人稀
黃沙古道吹風雪
蔓草寒廬閉棘扉
漢帝於今尊卜式
柏梁應笑露臺非

富池口

初日滄江宿雨醒
亂山無數一峯青
錦帆宮館灰飛盡
幾點寒鴉送客舲

熊伯龍字次侯漢陽人順治己丑一甲二名進士授編

修歷官侍讀學士有貽穀堂詩集

詩話鍾陵文自震川鹿門入入家雄偉光昌與黃岡
正相伯仲詩有才氣有魄力音響格調猶承七子遺
風較黃岡爲勝

重修晴川閣

雕欄玉柱入長空
檻外帆檣萬里通
春水遠來巴子國
雄風高壓楚王宮
鳳凰欲下簫誰引
鸚鵡無言賦獨工
直擬憑虛馳入極
雲霄何日羽毛豐

送宋牧仲下第歸商邱

祗爲秋風續楚歌
天將宋玉故蹉跎
承家不在科名早
落第眞如噩夢過
懷有雙珠泣白日
囊餘一劍渡黃河
羞稱獻納空揮淚
鬢蕭蕭木葉多

曹本榮字木欣號厚庵黃岡人順治己丑進士改庶吉士授編修歷官侍講學士

詩話厚庵侍講幄見賞 孝陵一日讀孟子人知之亦囂囂顧曰自得無欲汝足當之其眷注如此平生敦尚風義學宗陽明晚游吳門卒於舟次

雜詠

盧橘新傳罷漢中
尙衣聞道滅花戎
諸州節使休蠲助
聖主清心在合宮

方孝標原名玄成避 聖祖諱以字行號樓岡桐城人

順治己丑進士改庶吉士授編修歷官侍讀學士有

鈍齋詩選

詩話樓岡為肅之少詹拱乾子肅之諸子亨成膏茂
章鉞皆掇科第其命名取文頭武頭武脚事為世祖所
聞戲曰於戲哀哉亦文頭武脚當時頗傳其語樓岡
以丁酉江南科場獄牽連遣戍赦歸既卒又以南山
集探所著鈍齋文選演黔紀聞坐斷棺罪連家族遺
書皆禁燬近歲鈍齋詩選出鄂中始有傳鈔本當平
西叛時相傳樓岡汗偽命以迎降免死即詩中所紀
歲月推其蹤跡似嘗見平西而復歸里然於平西及
靖南父子皆有投贈長律已不免態高跡近之憾又
有論事詩謂出塞時聞山海關西地藏庵僧法乘言
親見李自成兵敗後殺莊烈太子及定王而永王還
京師亦為劉宗敏所戕其事乃不見於他書當王之

明至南京肅之首言其非頗爲時
論所不與或樓岡以此陰解之歟

答吳漢槎借讀通鑑綱目

可與言今古荒邊只有君賦詩能漸樸觀史不徒文我已
中年後心難強記分幸將成敗理抉要與同聞
胡天漢日月宋代魯春秋彤管當年筆牙籤昔日樓行廚
原自富腹笥更相謀茅屋清鐙意甯徒慰旅愁

妾薄命

花冷御溝煙春風影自憐君心纔易地妾命遂占天新法
嚴霜立深恩皎日遷但求中外事一一竟甯前

白頭吟

愛妾非徒貌憐郎不在琴如何才子意亦若世人心犢鼻
忘當日鳳音悔至今始知秦氏女真識使君深

依韻和鞠存

此生何意有歸舟
風雨江山涕淚收
蓬徑特緣求仲掃
剡溪應爲戴逵留
百年搖落甘三已
五岳踟躕擬四愁
人世幾回堪聚散
肯教離別易滄洲

樓暄

鄰園遠岫列平原
爭帶晴光擁華門
鎮日窗凝春氣滿
小樓人重夕陽溫
吟聲金石高能出
世面風霜靜者尊
知是天心憐范叔
綈袍盡典不須論

柯聳字素培號岸初嘉善人順治己丑進士授知縣歷官通政司左參議有霽園詩

詩話岸初初令東陽寇至督眾登陣城賴以全除禮科給事中在諫垣十八年疏五十七上稱政言康熙初乞歸詩以雄渾勝

西谿小築

卜居西郭半村中幾曲清谿一棹通
度壑鐘聲蕭寺外穿林塔影小樓東
樹因初植偏宜雨竹自新移卻畏風
倦起偶來松下坐農歌處處屬年豐

出都留謝臺中諸公

離亭簫瑟動秋風帳飲青門夕照紅
八月仙槎秋水闊千家礎杵暮煙空
河梁惜別存知己海內論交有數公
烏鵲南飛渾不定嘒聲還似柏臺中

王廣心字伊人號農山江南華亭人順治己丑進士歷
官御史有蘭雪堂藁

詩話農山詩沈博穠麗宋牧仲稱其七言長
篇有初唐四子之豐贍餘則嘉州信陽之間

大梁行送林平子

燕山四月槐雨涼酒徒擊筑官道旁
驪駒欲鳴慘將發爲君慷慨歌大梁
大梁昔當全盛日裂土苴茅建宗室
魏殿旌旗斗北翻汴宮花石城東密定王
憲王皆好才樊樓窈窕東堂開誠齋
舊帖龍文寫樂府新題鳳管催黃河如帶
縈天闕舞榭歌鐘幾時歇兔苑賓朋白雪尊
鴟絃士女金梁月中原千里接神京叔父勤王
更勒名雞犬願隨淮桂老魚龍忽厭蔡河平
一朝風雨金隄決殺氣蒼茫鼓聲絕龍章十葉赤帝孫
卻立銅人水中沒滄桑變易八九年我來欲渡愁無船
宮闕崩頽半深澤狐狸踉蹌跳空荒煙偶逢遺老
驅豚出端禮門中招共入銀樓藻井荇帶穿玉殿
鴟頭土花澀因言此殿西北隅飛廉九仞凌清虛濁河波浪埋不得
依稀繡栱臨椒除我登蘭雪軒更倚端清閣空梁

天矯墮盤龍古柏陰森少調鶴下尋石洞風翛然黃塵不
到秋花鮮雲英旣死梵鐙滅誰從此地求神仙嗚呼此景
當年識近日傳聞更蕭瑟華棟都輪少府錢碧蕞盡入空
王宅河山君到莫重論良嶽吹臺總不存但得晴天看少
室短衣落日過夷門

潘山人至自遼左得季給諫消息

塞外潘生到日邊滿朝驚喜帛書傳王修負擔真千里季
布髡鉗竟隔年華表鶴歸愁自語紇干鵲下冷相憐知君
醉後攀牛角一種先皇鄙上田

短轅一哭去長安鐵嶺金州道路難搔首有天垂北斗斷
腸無客對南冠管甯木榻經秋破蘇武羣羝落日寒那信
聖恩思直諫畫圖別苑兩回看

直方夜過憶卧子談詩

偶逢宋玉過西鄰把酒重論故國春
一榻早懸陳仲舉九歌親授屈靈均
衣冠白社沈秋草賓客黃初散洛塵
醉裏寒星空自數天門騎尾竟何人

寄懷張鞠存年兄

黃葉秋蟬忽滿林客愁況是別離侵
張騫槎去明河隔賈傅書來痛哭深
漸有清霜浮畫角更無流水入瑤琴
誰憐此夜淮南夢叢桂青青露不禁

城南別業近何如白板雙扉暮色虛
秋草不知王粲井畫橋猶記伯通居
湘簾對酒明鐙夕木榻彈棋聽雨餘
不信關干苦相憶倚來愁絕雁行疎

歲暮送孝持

讀書臺畔釣魚磯
彼美談經過
竹扉羽扇才名三俊重
烏衣子弟六朝非
雲生枳棘鸞偏集
霜撲蒹葭雁欲歸
莫道春風開徑早
歲寒心事隔年違

送荔裳

上客征帆昨夜過
江村風雨別愁多
東山自慰蒼生望
郢市空憐白雪歌
野寺開樽棲鶴雀
空梁撥棹散鼃鼉
承明到日應前席
須話桑田總逝波

飄零十載闔閭城
酒後悲歌白髮生
卻爲雷霆思帝德
偏從鳥雀話交情
青雲啟事才名重
畫鷁趨朝羽扇輕
早望故人喧列戟
東南紫氣有逢迎

贈別澹歸和尚

身世飄零夢屢更
雲山只抵一塵輕
曾求鐵漢樓邊死
偶

向金吾杖底生野寺梅花窗窈窕空林杜宇路淒清誰憐
海鶴心無繫又挂蒲團得得行

尙書墓道行

茸城北郭清明路士女提壺拜墳墓紙錢飛盡獨酒乾還
向落花深處坐楊柳陰陰枯柏晴尙書墓道滿嗝鶯牲碑
滴露行人淚石馬嘶風故國情老人指點爲余說尙書百
歲高清節第宅張蒼賜予隆邱山郭泰呼號切宰木無端
又百年根株蟠互葉相連祠荒蜀相春應老劍挂徐君樹
可憐子孫繁衍如嘉木玉樹瓊枝代相續翦伐誰憂召伯
棠青蔥不改萊公竹蹉跎奕世有蘭孫二俊才名眾所尊
貧賤那知公子貴衰遲偏受少年恩配邊萬里哀笳急木
葉山頭對相泣蘇武丁年鬢已非鍾繇丙舍嗟何及軍紙

抄家盡賜莊墓田門帖更淒涼十圍老柳千尋柏官吏商
量到北邙匠石操斤仰而立小者爲薪大論值昔日馬下
信陵墳今日牽牛到家石鄂君飛鷁正掄才南國梗梅豈
在哉輪囷生爲華棟用松楸死作濟川才昨日三江秋水
闊木蘭檝戒沙棠發青雀舟中有白雲麒麟塚上無黃葉
荒隧西風我重過石人瞪目雨滂沱君不見燕昭墓表千
年木旣遇張華可奈何

唐夢賚字濟武別字豹屈淄川人順治己丑進士改庶

吉士授檢討有志壑堂集

祈雨茶話

荷笠先傳樵客知蝸居如甌出休遲城陰黃鳥穿林早驢
背青帘過市低偶爾清齋堪嘆雨無端高詠憶圍棋只愁

十日淫霖苦雙螭朋尊欲自攜

念東先生東池見招有作

疏傳歸來酒政寬黃金日日買清歡平泉不作兒孫計世
界原如缺陷看固有鏡湖歸賀監曾聞微雨過蘇端敢云
二老同時晚來往風流後正難

濟上留別朱野巖

湖上紅衣搖落時閒亭竹樹寄芳卮青門射策人皆老碧
嶽尋眞事已遲別岸蒹葭留晚照前溪簫管動離思陽關
入破聲聲慢知共琴樽更有期

過故人舊圃

十年澗壑共棲遲往事衰涼有夢知月照清尊行命酒秋
分霜葉坐題辭鳴泉初引成渠日竹樹新栽見長時一自

山邱零落後閒亭無復水平池

座間和念東先生

柳浪捎簷泛麴塵相逢一日罷樵薪誰知羯鼓催花者總是芒鞋訪道人
大笑保蟲皆寄客徧宜野鶴似閒身龍華盛會吾徒在莫待僧齏話宿因

願大申字震雉號見山江南華亭人順治己丑進士歷

官工部郎中有鶴巢詩存

沈歸愚曰雲間自陳卧子後詩格漸衰鶴巢古今體氣足神完可以接武詩話見山詩有高華者有悲壯者如地隨督亢依山盡河控桑乾入塞來荒城野戍鳴秋柝海橋孤臣冷葛衣猶有七子遺響

登高邱而望遠海

軒皇且戰且學仙橋山弓劍攀龍髯吁嗟政徹不及此扶

桑滄海空青天沙邱之雲茂陵樹萬弩射魚氣張怒童男
未返青雀遙銀雁金鳧起泉路瓊田草不死蓬萊塵不飛
丹邱靈藥如可致千秋萬歲詎相辭汾陰宮瑯琊碣石麟
秋草莽蕭蕭銅仙望斷咸陽闕不見當時九鼎成鼎湖雲
氣時明滅

薛城

我登古薛城四望長太息此地孟嘗君鳴鐘會食客西掖
虎狼秦陵原羣失色再相綰齊組萬家張封邑長鈇鼓幸
舍狗盜揖左席一朝歸山邱車騎散敵國春秋祀忽諸百
戰荒荆棘歌臺嗥狐狸野人燒冢域誰抱雍門琴彈之萬
古宅

雪後登歌風臺

一劍收秦鹿秋風萬里心悲歌誰掩泣壯士已成禽井邑
新豐舊藎蛇大澤深殘碑埋野戍雪後此登臨

送紀伯紫入閩

短褐科頭故國遺五言新體舊京詩多情愁對青谿柳老
向南荒擘荔枝

玉帳牙門異昔時憐君萬里赴戎機渡江裘馬多零落今
日參軍盡布衣

送沈繹堂編修遷大梁道

鼓角北風涼雙旌入大梁十年悲瓠子萬馬散敖倉少府
新沈璧中原古戰場君行能卧治未許薄淮陽

出平定州

忽爾危關豁羣然眾嶺低山連雁門外地出井陘西亂石

淹人跡層冰怯馬蹏相逢故鄉客鎧下手重攜

始發良鄉

上馬頻傾惜別杯
薊門西去亦悠哉
地隨督亢依山盡
河控桑乾入塞來
老去尙能持漢節
時清應不重邊才
冰霜漸逼君門遠
東望長安首重回

秋雨移酌櫟園舟中

雲滿東山急雨霏
移觴對酌兩依依
荒城野戍鳴秋柝
海嶠孤臣冷葛衣
醉後元黃鎧半燼
尊前風雨雁初飛
君看豐沛笙歌地
昔日高臺今日非

吳亮中字寅仲號易庵嘉善人順治壬辰進士授戶部主事歷官員外郎

詩話寅仲少與同里錢爾玉郁光伯魏子一子聞子存昆仲曹願庵蔣亭彥爲文字飲爾柳洲八子酒脯

筆札寅仲主之構來問堂
鍵戶力學在官有政聲

邗關夜步

千家燈火映紅妝九市笙歌沸月黃
散盡斗金人未醉撥殘銀蠟夜偏長
簾深豈信朝迎旭煙暝由來曉不霜
從古騷人潦倒地獨慚願況更清狂

發渭門宿茶喜灘

連山草木繁橫縱始鋤葺亂離二十年
親故不復集榛莽襲衣裾誰能辨井邑
結茅漢之厓纒短亦可汲雲深日曛
曠作息隨出入種菽在岡原種麥在阪隰
麥生山彘多況復官租急

成亮字寅天號伍嵐大名人順治己丑進士
改庶吉士授編修遷戶部主事

詩話休嵐幼曉甲申之亂盜蜂起侍青壇相國避寇倉猝盜至侄嵐以身翼父捍白刃不為動居母喪以

毀卒

村居

秋入村居衛水新蕭蕭蹤跡託荆榛桑田有政供吾課盤
味無兼愛客頻風雨匡牀堪豹隱雲霄枯木半龍鱗朝朝
晚起無多事課子橫經懶不噴

王庭字言遠號邁人嘉興人順治己丑進士歷官山西

布政使

詩話邁人居官清惠罷歸後足迹不入城市詩品甚
高直抒胸臆其神似陶韋處非從摹擬得之詠潼關
云代更干戰少勢在一夫
多感慨無盡語尤警絕

雨後

落日殘雨餘林樹半昏黑南山白雲閒澹然見秋色冷風

何淒淒微微野煙息歸巢鳥更鳴當戶蟲還織惆悵獨坐
時悠悠思何極

秋雨遣懷

抱病身獨閒起行日云晏蕭條空林中靡靡秋雨徧殘葉
踏飢禽荒村吠寒犬虛室靜琴書閒階冷苔蘚欲愁生計
疏還嗟世情淺自適在邱園匪能薄軒冕悠悠歲月深閒
情誰當遣

送褚君培

夕陽送君去浩歌成獨還君來山窗下竹石如我聞眾鳥
自棲息月明溪水間柴門復誰待呼童方閉關

所思

所思竟惆悵夜寒風雪深嗟君重離隔感此孤曠心將以

路云遠幽夢能見尋翩然發清興爲我彈鳴琴柴門宛如
昔相送在南林共言別來意日暮愁鄰碁

棧道中作

人行山上高天在山中小圓暉易沈夜初陽遲報曉馬走
山樹巔飛鳥出其下雲連深洞迷石缺危橋架七盤非險
途三秋足清景日夕留泉聲誰能辨喧靜

潼關

關門高鎖處飛鳥不能過雉堞連羣嶂風煙俯大河代更
千戰少勢在一夫多入夜聞刁斗軍聲壯若何

曉雨

獨鳥鳴南園曉來雨初息空庭生秋陰莓苔長寒色

董文驥字玉虬號易農武進人順治己丑進士歷官甘

肅隴右道有微泉閣集

詩話玉虬懷古諸作蒼渾激楚有節短韻長之妙漁洋賞其題淮陰侯祠春雨王孫草靈風古木叢二語又有汾陽道中詠梨花云待人雪夜寒無粟騎馬平明淡掃眉亦用事無跡風韻絕佳

故關

神都西北界天險設故關連山千里來微徑纔縷間斷崖
刺天仄金城本塹山崇墉冠其缺雉堞紛迴環入谷騎擁
塞緣雲鳥飛還一夫荷長戟百萬未敢攀白旌昔奮呼來
去無險艱防虞此何及守在羌與蠻

緣無定河行

昔聞無定河遠使河之涘源自大荒來濁浪吼千里奔流
何湍悍頽沙性善徙地是古戰場四顧悲曷已其窟漲征
魂貂錦三千死時清無戰骨水寒終北鄙磨刀刀未瑩飲

馬馬不喜一望塞垣深九月邊風起歸渡會冰堅悲哉宦
游子北首溯河源怨此南流水

和吳學士梅村送王元照

故國重來客薊門宣和遺跡一無存白頭只索丹青引文
彩風流舊子孫

暮抵蒲城望餘雪

秦山雪後看餘雪半峯寒馬色斜陽盡車聲古道乾金城
悲麥秀玉殿想雲端暮鳥歸飛急王程尙未安

驪山溫泉

山上千門山下池玉環何處洗奚兒野人分得溫泉水菜
甲紅於錦荔枝

三月廿二日汾陽道上見梨花折得一枝口號

東風遠到晉山遲三月梨花始放時
雨裏粉痕殊鄭重月中空色共迷離
待人雪夜寒無粟騎馬平明淡掃眉
九十年光故園外鄉心客眼寄瓊枝

題長平驛壁

上黨南來狼孟城連山地險不利兵
鼠鬪穴中勇者勝父書能讀徒空名
趙王何愚趙人哭國中壯士盡長平
土花血碧拾金戟戰場處處今人耕
已降殺盡爲鬼雄前有銳頭後重瞳
杜郵之士烏江水劍且賜兮船自艤
六十萬人含笑死

北邙山

陟彼北邙山纍纍滿昔賢松柏摧爲薪
原陵犁爲田石馬卧秋草玉魚出下泉
而況洛城內歌舞化寒煙燕趙有佳

人蓬萊有神仙一笑輕千金一九駐萬年

復過井陘口淮陰侯廟

背水千年廟登壇百戰功至今思赤幟何處弔藏弓春雨
王孫草靈風古木叢淮陰年少子終自笑英雄

真定客舍對雪

窮陰滿太虛積雪凍庭除鴉點埋雲樹童依宿火廚君思
狐白厚老病酒杯疎江國寒梅早垂垂已待予

庚戌元日移家惠山舟中作

東風自信片帆斜百里鄉園路豈賒愛聽山泉因煮葑並
驅雞犬似移家未聞春鳥來檣燕已見寒梅笑岸花萬國
朝正看北極十年拂霧馬歎沙

去年元日棄孤臣趙北燕南滯病身八口一舟遷易散吳

山楚水信難眞卽看妻子還疑夢高卧江湖又早春只恐
鶯花饒笑我拂衣斑鬢已如銀

周體觀字伯衡遵化人順治己丑進士改庶吉士歷官
江西參議道有晴鶴堂集

贈陳伯璣移居

重開三畝宅環堵正相宜花落春城晚人歸故國遲鑑湖
原是曲鄰笛爲誰吹獨踏庭前月依稀授館時

秦笛仙赴岳州雨夢見之

薄暮輕爲別扁舟去渺然干戈南國外雨雪大江邊信宿
行應遠登樓望獨懸春來能幾日客夢益相牽

周茂源字宿來江南華亭人順治己丑進士歷官處州
知府有鶴靜堂集

詩話宿來早入幾社才力尙不逮陳卧子李天章諸
人官此部時與同署宋直方施愚山相過從飲酒賦
詩風雪不輟列
燕臺七子中

苦寒

我行適南服絺綌生微涼山川倦游覽草木多隕黃商飈
一以至莎雞鳴我牀弭策且延佇駒隙殊未遑誰云甌土
燠重纒無嚴裝堅冰既已合甯獨驚履霜薄帷障虛館堊
戶鮮閉藏中夜不成寐攬衣起徬徨游子倦行役歲晏思
故鄉雖復羣動息萬籟增感傷噉噉雲中雁天風吹枯桑
寒夜飲董閩石齋沈醉而歸因以自嘲

積冰盈四衢言赴江都約座中四五人顧盼皆英倬主人
兄弟賢愛客善諧謔周生本不羈忽爾過三爵惛惛弄明
瓊鹵莽呼鑿落華鐙吐焰微霜月逗簾箔夜分客未散都

覺颺裘薄屣履下階來一醉忘酬酢空負拍浮名不復勝
杯酌豈意僕射酒竟類羊公鶴

天目禪師自僊巖枉過旅館

繡佛清齋久微塵拂鏡臺擬參龍井去翻度虎溪來月色
諸天淨潮音五夜回片言闡了義花雨落莓苔

玉華洞

尋山玉洞幽縹緲上飛樓冷翠常疑雨空巖總似秋石壇
延鶴駕雲海望麟洲款段依鄉井真嗤馬少游

暮抵汀州詰旦與成子分道

入暝方停轡勞歌易感傷怪禽樗社裏孤犢火田旁淡月
嘯螺女陰風舞蜃郎那堪同旅別明發尉佗鄉

贛江舟次

雙流移棹促篷底亂山斜細雨紅蕉葉輕風白葛花客行
灘路慣愁對楚江賒聞道青原近無由訪鹿車

舟泊錢塘

津亭極望海門遙水國輕寒夜沈寥隔岸青山神禹廟中
流白浪伍胥潮春星萬點連漁火宿雨兼旬變柳條咫尺
桐江圖畫裏牽舟無奈石尤驕

春日過桐廬晤張無近

離情猶憶薊門花邂逅津樓感鬢華繡嶺春深紅藥潤晴
江漲後白鳩斜遲遲拄笏看朝爽歷歷揮絃對晚霞爲問
桐君仙宇近玉潭幾處滿丹砂

舊山

舊山無恙掛煙蘿此日傳烽竟若何笳鼓江關屯虎豹樓

船海國混鼃鼃千重錦樹浮雲暗滿目寒松落照多愁絕
正逢南客至鄉心細與問漁蓑

懷季天中給諫

遷客音書隔歲回窮交萬里塞垣來短裘射虎陰山暮霜
管題詩獨石開遼海沙寒沈劍珮淮南木落隱樓臺關門
生入應青鬢不待班昭疏屢裁

去年徒跣出都城灑涕呼天送爾行漢苑鶯花虛諫草燕
臺風雨作商聲馬蹏羊酪愁顏老短笛悲笳放夢驚山水
烏丸稱絕麗畫圖何似玉泉清

秋杪坐雨柬蒼水

登臨蕭瑟最愁人况復窮秋雨浹辰簾外掃花芳徑滑渡
頭沽酒夜潮新西林小鳥歸紅樹南浦輕條上白蘋料爾

閒居應有作羊何甯厭往來頻

蒼玉洞

郊行十里碧湍隈
縹緲蒼巖見玉臺
石作蓮花疑華岳
山移銀闕近蓬萊
仙人月夜驂鸞過
游女晴春拾翠來
卻恨斜陽催客騎
無由道左一銜杯

過陳黃門墓

碧血當年濺鐵衣
猶餘蒲首入泉扉
草深斷碣眠香麝
花落空山叫秭歸
夜雨靈旗嘗自出
秋風石馬竟何依
大招擬賦還停筆
挂劍潛來恐是非

贈總憲龔芝麓先生

楚江涵遠潤衡霍
動靈光哲輔乘時出
醇儒翊運昌卿材
三策祕帝眷
九遷良絳灌
功難並夔龍
讓未遑殿前推執

法海內頌惟康久缺埋輪使仍多題柱郎誰人持國紀特
與勵官方密勿來申命訐謨足大匡中丞親佩印副相獨
登堂文采蘭亭聚稜威柏府疆朱軒排曉霧白筆麗秋霜
鬪自騶幡解邪因鷹角藏格天封事切名世表儀莊班劍
連珠烏微鏡映紫囊鮑宣懷直亮熊遠著清剛峻若盤鵬
鶚祥猶集鳳凰讀書還見士授簡更飛觴儉匪菑川被貧
逾蜀郡桑黑頭公望重黃髮壽朋臧蓬矢今初度緹灰恰
肇陽莫窮薰草厯無算吉雲漿元鶴金庭迴丹蘂玉井涼
上尊膺和鬯仙樂播笙簧一德真同泰祈年衍慶長

鍾明進字子佳號偉叟長興人順治己丑進士厯官惠

州知府有兩粵吟南園集燕中草

詩話偉叟權知廉州值耿精忠之亂城陷脅降不屈
囚諸鬱林亂定傳忠毅爲疏請甄叙格於部議歸老

於家

鬱林除夕

旅中歲月恨淹留此夕偏驚斷梗浮
鼙鼓山河烽未靜梅花村落笛多愁
不堪臘盡悲霜鬢又聽更殘報曉籌
萬里鄉心何處達夢歸猶恐過廉州

張三異字魯如號禹木漢陽人順治己丑進士歷官紹

興知府有來青園集

詩話禹木初令延長歲旱蝗施粥平糶飢民賴以全
羅南陽同知唐縣民謝萬程以父喪不能舉糶其妻
郭郭至人家不失節或以逃人訟於官禹木廉得實
召萬程至捐金贖郭俾為夫婦如初一時傳為嘉話
遷守紹興亦有惠於民

美斯橋步月

秋盡寒砧急溪光上客衣
人煙和露冷野色襯霜輝
竹道

敲風細林深逗月微漁翁貪共話忘却掩荆扉

夜泊危家渡

白露凝帆冷鐘聲出寺南月華穿曲徑山翠落深潭舟泊雲同卧燈殘酒半酣縱多愁緒在不敢負幽探

程雲字天翼萊蕪人順治己丑進士官孝感知縣有松

壺集

詩話天翼所為百喻詩雜取諸家勵志訓俗之語澤以交藻辭近指遠今體詩清勁質實擇言雅馴不蹈公安竟陵兩家末流之弊惟不甚講聲律為其疵類集中有和王阮亭彭羨門無題詩自注謂未見王彭詩原作感舊集亦未採錄其詩蓋與漁洋雖同鄉郡不通聲氣當時知其能詩者不多也

徂徠

不爭岱岳尊所隔猶尺咫面面成一方百有六十里五汶夾之流不然滔天起孫石讀書臺峯巒不容趾至今竹溪

存千載思高軌矧其對衡門朝夕互青紫或言采昌陽可
以延年祀飲酒不暇仙終焉聊復爾

秋日赴飲田家

曳履行徐徐秋老一望白到門槐柳合入門踏牛跡羅坐
斗室中瓜蔓上屋脊田夫禮貌恭欲言笑啞啞今年幸薄
收所餘一斛麥貧家無釀法苦酒如黃蘗稚子挈壺出短
几不盈尺可以采園蔬棗熟亦堪摘是時山雨過微風入
籬隙向夕石路滑歸家借襪

朱不凡醉綠亭

東隅亭子秋尙酷茂林繁露溼朝旭早起科頭過板橋憑
闌澹寂恣遐矚老藤化石骨崢嶸古螺吸水苔衣綠攜來
幾卷陶柳詩僮子爲我沽醞醪

輓王禹符

誰爲銘墓石欲泣已無聲
吾黨論兄弟斯人見性情
夕陽孤樹直寒月短碑橫
垂白雙親在九原恨未平

東蒙秋日

九日易爲風淒其遠望同
碧山分雪白黃葉變霜紅
客夢初聞雁鄉心久憶菘
祇今將改歲何以謝東蒙

送還雅

孤館何淹滯兼逢世難中
秋深終一別日暮暫相同
客路沙邊雁人家岸上楓
甲兵猶未戢消息可能通

郭同年冰湖道過孝感

咄咄吾兄弟除官似逐臣
孤帆臨百粵萬里背西秦
薄海威無敵窮荒僭未賓
安能久抑鬱去住總悲辛

涉汝

九月徒杠少褰衣及半途岸容高自出雲影澹如無白髮
心先冷清秋興愈孤道傍馳馬者應不識潛夫
驅驢行不進延佇立沙汀兩岸蘆花白一行雁影青抵家
惟數里薄暮已多星祗有田家樂柴門早自扃

往東村

不爲省秋稼何嘗欲出門斜陽留一岫疎雨隔前村棗尙
垂荒隴桃應落故園及時爭刈穫野老領兒孫

客歷陽成同年率菴憶初園中秋酌桂

疊石爲山暮景寒扶疎繞徑此憑闌百年月在尊前出千
里人來雨後看手澤不忘桑梓敬鼻觀豈受木樨謾拂衣
早遂初年志難種江皋續蕙蘭

謝泰字彙征號建侯大興人順治己丑進士官竹山知縣有蓼集編客中吟

從軍行

月在人千里君從月下行不知君遠近惟見月分明斜漢垂秋淡寒蛩泣露清征旗何所往疑聽夜笳鳴

陳丹赤字獻之號真亭閩縣人順治辛卯舉人歷官浙

江温處道殉難贈通政使諡忠毅有客吟草

詩話忠毅為政清簡歷官皆有政聲耿精忠為亂温州總兵祖宏勳叛應之忠毅與永嘉馬奉璋大令環皆不屈死難事定褒卹大令贈布政司參政諡忠勤建雙忠祠於道山民間歲時所賽至今未輟

晚泊乍雨

一葉臨孤岸微茫煙雨中濤聲都帶白霜葉漸留紅雁影拖殘照漁燈映彩虹陰晴渾未定身世託飄蓬

趙吉士字天羽號恆夫錢塘人順治辛卯舉人由知縣

歷官戶科給事中有萬青閣自訂詩新又堂詩

詩話恆夫初宰山西交城寇阻山劫殺恆夫乘雪夜督兵深入破其砦寇遂平以是有能聲遷戶曹郎入諫臺官京朝甚久嘗築墅城西號寄園有池館花木之勝日嘯詠其中金壇于漢翔章雲投以四詩恆夫依韻酬答後凡遇他題皆用此韻積至千首署為林卧遙集編次入集後又廣之得五百首署為千疊波餘兩種又合刻集外別行和韻詩始自元白恆夫疊至三百數十次蓋古所未有亦創格也

贈吳田吳慎先

人不得其真舉動多踉跄所以古達人任天無羈束我獨
重吳公本來輕寵辱數畝傍清溪分種秫與粟戶外橘柚
香窗中巒岫綠叩扉素心人一尊醉醺醪安居無所營澹
者乃知足

柯城送任文階還陽羨

竹舍青鐙漏未沈
夜寒先入旅人衾
一簾煙雨難爲別
千里江雲共此心
意盡還聞巖半嘯
曲高止作郢中吟
莫愁我輩長貧賤
爨下枯桐有賞音

欲歸

暮角吹斜鬢
孤尊佐客饗
雲移新雨月
霜斂近秋松
谷口清嵐染
巖尖紫翠縫
欲歸歸未得
殘照曳疏筇

戴田有歸江南程香升入幕
秦中別後登樓玩月鄉思轉深

墨香縈滌硯
入座愈清輝
韋柳真詩在
求羊好友稀
樓高孤月伴
石古亂秦圍
年老難成寐
家園無夢歸

姚文烈字覲侯號岷懷桐城人
順治辛卯舉人由推官
歷官楚雄知府

別友人

三春朝夕感殷勤，又看榴花隔院分。
惜別江淹纔有賦，送窮韓愈久無文。
輕風紫燕高低出，永日黃鸝遠近聞。
尊酒不堪長嘯傲，湖山煙水惜離羣。

謝天樞字爾元號星源侯官人順治辛卯舉人官慶遠推官有嶺外集

重九偕許有介山居讀書

數茅結似老僧關，四面青光落古顏。
聞我兩人當九日，讀殘半卷暝千山。
天平秋氣綠菰外，客瘦夕陽黃葉間。
風雨滿城聽未得，此中高卧不知還。

戴宏烈字山民號鐙巖桐城人順治辛卯舉人官成都知縣有朗瑄齋集西嶽游草

同黃子正出居庸作

偶謝承明去聊爲塞上行
千山橫朔氣萬馬動邊聲
上谷風沙暗漁陽鼓角鳴
江南庾信在蕭颯盡平生

九江

戎馬瘡痍已十年溇陽灰劫倍堪憐
水分九派濤聲闊山抱孤城塔影懸
野燒荒原銜落日秋風廢壘起殘煙
蕭騷此際江州客一曲琵琶意惘然

懷孫大振公雲間

卧病荒村歎索居故人懷抱近何如一
時湖海交游盡千里河山戰伐餘
夜雨空庭常對鶴秋風古渡正烹魚
遙憐有客飄零久不寄征鴻尺素書

鄒山字宏景號禹封天門人順治辛卯舉人官玉山知

縣

初聞罷官

到今方賜罷執政恕微官覆局終何定纔休便已安旁人
爲削色稚子羨加餐正好賦歸去移文報北山

宋實穎字旣庭號湘尹長洲人順治辛卯舉人康熙己
未舉博學鴻詞官興化教諭有讀書堂老易軒玉磬
山房等集

八月十八日觀潮

頭白燈明急管催高樓晴檻倚江開潮聲夜靜千帆轉斷
岸風迴萬馬來吳越山川供醉眼古今天地獨登臺九秋
蕭瑟誰堪賦滾滾詞人庾信哀

和鈍庵歲暮雜感

年少才名也自雄
老來城北半飄蓬
閉門種菜渾閒事
輸與人間霹靂弓

五十誰能讀五車
黃庭白帖任冬餘
江門老子詩偏好
只對青山不著書

邱履程初名廣生字鴻漸成都人順治辛卯舉人

寄費二參軍此度嘉州

刀鋌初出骨空存
又曳輕裾上將門
才略自能追越石
旌旗誰復似桓溫
芙蓉麗發新文藻
薜荔衣香舊夢魂
志士何妨聊袖手
空山歸卧聽嗁猿

徐作肅字恭士商邱人順治辛卯舉人有偶更堂集

過周肯齋東村

僻地容來往
秋天別業清
傾壺耽一醉
好雨坐三更
近水

暮雲入新田晚稻平開開堪著賦何事欲關情

人日同友人游閔伯臺因過草寺歸留小飲

今歲今時春早回絕憐晴日淨纖埃遙青欲起梁王苑古
寺爭馳閔伯臺茗椀空郊閑土甃梅花小榻故火杯還看
淑氣深相引次第羣芳杖底催

譚德馨字紹元號又庵新會人順治辛卯舉人有又庵
詩集

喜晴

竟日攢眉坐今朝一放顏白飛歸壑水青送隔江山牧笛
平林外漁罾落照間野人防雨意猶帶綠蓑還

晚晴移詩匯卷二十五終

晚晴移詩匯卷二十六目錄

范承謨 四首

嵇永仁 四首

傅宏烈 三首

曹爾堪 十六首

王士禛 十六首

王士禛 十首

王孫蔚 十二首

程可則 八首

沈荃 四首

耿介 四首

笄重光 五首

楊素蘊 二首

張永祺 四首

丁思孔 一首

項景襄 二首

張可前 一首

傅感丁 一首

郭棻 九首

余縉 四首

王廷璧 三首

李昌祚 一首

劉必顯 一首

葉矯然 三首

張潛 一首

張晉 四首

楊端本 六首

曹同統 一首

陳維國 二首

趙原 一首

戚藩 一首

晚晴移詩匯卷二十六

徐世昌

范承謨字觀公號螺山又自號蒙谷漢軍旗人順治壬

辰進士改庶吉士授編修官至福建總督殉難贈太

子少保兵部尚書諡忠貞有范忠貞公集

詩話忠貞為相國文肅公仲子初以任子官侍衛入
詞館後由學士驟昇對圻撫浙四載多惠政迨督閩
值耿精忠叛被幽七十餘日不屈遇害今所傳之百
苦吟畫壁詩皆精誠貫日可與文山正氣歌後先輝
也映

句留吟

此鄰礁驚夢憶舊之作也詞內藏
署中同時被難諸人里族字諱

春日溶溶向夜深松濤砧韻漏沈沈蘭亭少長頻來夢踏

泛句留指碧岑碧岑高聳雲盤出四野青濛星陸續手拂

瓊霄袖落霞目低銀漢迴衡王玉衡遙指鳳凰城望美人

兮心怍怍瘦骨雖無縮地術冰心尙信自天成仰天欲語
心轉苦懷抱縱橫天尺五奕葉貂蟬著國華肯將姓氏汗
家譜倦眼迷離望莆田酸風如箭射眸穿三年破榻悲誰
語幾堵頽垣痛各天各天同難天應祐紫電青霜烏巷冑
將軍親執繡雕旗躍馬直前真盪寇一戰成功抱犢開朝
來泛水暮留山那知多少東陵興都付西風殘照聞董賈
文章蟲唧唧窮通貴賤禪中蝨誰御長風汗漫游我欲從
之萬事畢恍忽天際兮來我真人駕玉麟兮飾寶琛建朱
旆兮耀金廷邀王喬兮酒數斟舞袁公兮撫真琴韶武迭
奏兮開余素心何以處此寂寞兮聞太古之元音繼而坐
予芝山之巔雙松之下啟口微吟曰海日升兮東方明卿
雲爛兮泰階平仙霞開兮役五丁山魃馘海鯢烹何爲悽

截齧左右難堪兮怒色加環睛按劍語聲譁十日肉枯神
愈健咆哮怒者亦興嗟武彝武彝古人風慨吟包胥賦孤
忠秦庭七日能完楚君更餘三將無同君何不忍須臾死
未必天心遽如此懷光希烈真奇兇終須斬馘獻天子君
不見公孫杵臼告程嬰成事稱難死事輕無論鴻毛與秦
岱漢節終歸蘇子卿我聞此語轉增苦我何人斯比蘇武
暫吸滴水效吞氈可能鍊石將天補垢面蓬頭欷復歔滿
前異類總狂且生何爲兮死有恨朔望踉蹌拜帝書多君
慷慨心如揭吾亦披肝飲君血炎荒毒日渴喉焚涼我燕
山片片雪冬月悲風透骨寒殷殷雅意續還熱一曲長歌
筆未終啾啾四壁蟲聲咽嗚呼誰爲濟陽之裔兮子暨諸
孫覩此片紙隻字兮須知爲死血將盡之流痕當思何以

處此兮慰我生前未了之幽恨吁嗟噓滿目冉冉兮八千
 里外之游魂若使悠悠復泛泛辜負親恩與國恩子寫武
 竟不覺慨然於中也久不親筆硯乍逢故物悲從中來兼
 拘孿之餘隄防之際遂致闕漏姓氏誠恐朝野之間兄弟
 子姪輩不知妖氛逆焰中向有懷忠抱義任使者沈埋其
 間而能物色孤臣周旋患難於兩載之久使持此以報朝
 延則為勒躬殫節之人具此膽略以任疆場之事則亦干
 城禦侮之選也子家兄弟子姪儻能效古大臣以人事君
 之義則予雖橫尸巷陌亦將含笑九原矣武彝子何姓許
 名鼎閩之泰甯人也行者浮何辱親敗子誤國庸臣范承
 也謨

稽留山寄觀騷註參證詩以紀之

屈子沈抑千載無

一片濟人熱腸不意際此顛隕之秋困頓英哲俾
 獲著述傳世流播無窮留山可為三閭知己上帝
 功臣矣

懷沙匿奇迹忠彰道未揚抑鬱千載間蘭蕙隱華芳值茲
 顛覆初哲人罹危疆冥會著遠游汨羅忽翔翔浩浩水無

垠莽莽雲俱蒼應知素心人掩涕不可將

絕命詞

連宵烏鵲南噪曉聞王師已逾仙霞取劉二

逆初謀攜裝泛海繼以眾情弗順始議投誠

一笑襟開萬怒平龍興有寺葬真卿執旗厲鬼爭前導埽

盡穿牆穴壁甍

嵇永仁初字匡侯字留山又號抱犢山農無錫人諸生

隨范承謨死難贈國子監助教有抱犢山房集

詩話留山以諸生入幕臨難不渝在獄諸詩忠義

之氣凜凜然如生子若孫兩世韋平知其貽謨遠矣

憔悴吟癸丑秋邑侯吳公餞余於聽梧軒招集秦太

史對巖陳進士椒峯暨詞客及山夫余淡心

諸子同拈踏莎行詞未以憔悴二字限韻詞中有

孤城殘角夢家山亂帆影裏人憔悴之句余心忤

忤動歸述之老父欲不果行老父曰相國舊誼其

忍負之遂促余行至幕府日輒病脅痛號欲絕恐

居不祿之辰歸念頗切舉顛末告之蒙谷蒙谷為

煙失翠管然一見心如醉停驂暫緩入山期哀鴻
待爾離樵梓余讀之驚愕私謂許子亦懷惕相對者
心之聲也何爲作此不祥語許子難余緣情勉留
嗟知將不免因決情而去卒脫於難余不忍去也
遂逮於禍非知幾之暗也情所感激不忍去也
忍去而夫非但薄情抑并悖義嗟乎嗟乎禍患有
因端倪先兆今日惟悴至
於此極余固久知之矣

余本抱犢人東皋有荒田荷鋤將經營課僕耕雲煙天南
節度不肯放聘書早到薜蘿邊薜蘿閒挂處士牆處士一
去令君傷招攜賓客置餞觴吐詞製調魂飛揚有心負米
戀草堂堂上念舊催治裝可憐離別九迴腸涉嶺逾灘躋
險峻一步一望吳天長羈棲伏枕藥鑪間海濱倦鳥思飛
還好音慰藉情淒婉勸我停驂遲入山好友掉臂行病夫
銜淚住張羅設網日月昏冥冥翔鴻去無路雨雪從來霰
集成著龜四體先分明自是愚忠被束縛休嗤野客迷歸

程吟來憔悴看雙鬢只恐秋添宋玉情

顛倒歌

從前相依蒙谷者受其恩辜其德盡爲衣冠中之穿窬及受難日此輩皆不與豈奸狡之徒巧於攫金者亦善於避禍歟余與林翁能任王翁幼譽沈子天戒皆落落寒素家無僭石之儲堅守經經之志與公誓同患難不畏刀鋸不豔勢利逆雖百計挫磨初心不拔彼奸狡者應挪揄呆漢之舍生取義也

顛倒英雄孰是非伯夷餓死盜跖肥太史著書發悲憤問
天不應增歔歔寒士好古艱遇合牢落科場遭踐踏肉眼
豈識璞中玉銷魂還逐風前蠟家徒四壁依傍人巧者致
富拙受貧憂讒畏譏歎維谷猶幸知己愁眉伸道義相交
澹如水金多交深物所鄙小人有母孰養之千里輕身浪
擲死死忠死義原相成惟有罔極魂縈縈山鬼挪揄誇明
哲閭里溫飽翻偷生辜恩報恩口莫計世上休輕天下士

金烏玉兔疾如梭千秋難解顛倒意請君熟讀顛倒歌英雄英雄可奈何

擬古詩

蒙谷以炭畫紙上書顏杲卿伯夷蘇武三古

死既不得十日絕水漿求死又不得是杲卿伯夷天已不欲令其繼之也無已請學蘇武

常山舌既乾兩耳了不聞聲留白刃間遲迴邊陰雲首陽

腹已餒薇蕨徒芳芬精氣彌豪放鼎食安足云維彼蘇屬

國持節收羌羶十年如一日冰雪嚼紛紜求死既不得堅

志豺虎羣從容與激烈大道原無分上林口雁札終得達

聖君願言勵忠悃天心將罷軍

紅橋莊歌行

癸丑秋余婦送至吳門止於外家之紅橋莊是日天色甫明薄霧漫水面乳姬

抱兒輩佇立岸上若不勝慘切生離之狀人非木石孰能無情每一迴思腸寸裂矣

秋風蕩漾扁舟早雙槳到門攬懷抱薄霧籠煙水氣蒸雞

鳴桑樹催晨興懷中潔白鷺湖綾眼枯難拭淚痕凝良人
遠游意飛騰不知前路多寒冰雖然弧矢分所應臨深履
薄生戰兢上有高堂下乳稚養親教子將何憑出門兒女
愁葛藤欲語不語長撫膺矯情揮袂急解纜兼葭搖落鳧
雁升野老滌場將打稻漁翁撥刺亦開罾惟有征夫捨耕
釣紅橋莊上畫欄凭

傅宏烈字仲謀號竹君進賢人舉人官至廣西巡撫撫
蠻滅寇將軍加太子太保諡忠毅有傳忠毅公集

詩話忠毅初官慶陽知府奏吳三桂陰謀不軌坐離
間遣戍梧州及三藩變起糾合土司兵盡復廣西地
進規雲貴爲叛將馬承蔭誘陷賊中不屈而死臨歿
書絕命詞云自分一死無餘策身爲厲鬼誅羣賊忠
耿之氣可貫日月

憶山居

當年松菊徑悵悵問何之既覺山爲遠方知我在茲嵐收
孤影秀雨歇半峯奇便作悠然賞臨風每繫思

清遠峽

暝投雲際宿疑作水中仙羣壑去無路斷涯窺有天清猿
嘯嶠月白鳥宿江煙往問前山寺飛來有幾年

絕命詞

自分一死無餘策身爲厲鬼誅羣賊絕食依然浩氣存鼎
鑊刀鋸求不得天不假我以速終天心人意莫可測吁嗟
徂矣命之衰惴惴生平無薄德

曹爾堪字子顧號願菴嘉善人順治壬辰進士改庶吉
士授編修歷官侍講學士有杜鵑亭南溪客裝里音
等集

尤西堂曰曹顧菴學士承宗伯我雪先生家學復以
高第入玉堂海內翕然有談遷彪固之目博聞闕覽
下筆數千言所著南溪文略鼓吹六經酒漿諸子沐
浴潤澤於八家之中而尤工於詩庶幾乎登開元之
堂入大厯之室間以餘技綴為小詞第其品格在眉
山渭南間沈歸愚曰學士性英敏所過山川既塞
無不指掌形勢人與之游凡姓氏里居官爵與所覽
詩文積久不忘卽虞世南之行祕書可移贈也詩文
頃刻成同館無與爭捷者察開朗有經世之志景陵深賞之許
詩話顧菴聰坐是見嫉中蜚語罷歸同時京朝諸公
爲學問最優沈沈釋堂詩曰天涯話別重蕭騷客舍今
多賦詩以餞苒星霜憐舊雨遲迴鏡火戀同袍名山
年醉濁醪荏苒星霜憐舊雨遲迴鏡火戀同袍名山
蠟屐秋應健白社題詩老更豪歸及柴黃佳節近知
君何處獨登高有門生能抗疏不然天外作閒身大笑
東華十丈塵既范蠡湖中又疏人祗是故交憐話別
牙臺上誰千古范蠡湖中又疏人祗是故交憐話別
菊花時節淚霑巾門生抗疏謂廬陵張贊也
山學士同時以直言去國顧庵門下士也

游吾谷

高天熱未平深林綠已老知是古人宅瘦蚓號陰草追維

廖賴徒探尋極深窟土腴泉更滋迴峯兩肘抱重局漆鐙
黑一聲天雞曉人來鳥雀去葉大颺颺小楓赤游更佳秋
心已縹緲

嘯臺

李空同撰碑左國璣書

兩山翠柏搖天風古臺突兀荒山中宏正殘碑斷復續左
氏書法文崆峒摩挲句讀歎古雅萬顆真珠春自瀉中散
原非入道姿公和本是逃名者人間機穽苦相撻石髓青
精足養生嵇公援琴阮公哭虛負空巖長嘯聲

金魚池歌仿杜樂游園體

池邊風日足留賞曲水平隄暗菰蔣且駐巾車卧綺疏啟
肩拂簟楸枰響皎月樓開雲母屏商飆簾動珊瑚網紺殿
凌空青靄間步虛聲在青雲上飛汞煙沈道士鑪落霞閃

映仙人掌畫明金闕翠華臨池道清塵畏來往玳瑁魚斑
日應長恍在江湖盪蘭槳名園豈是金谷奢福地真如朝
川爽喜與諸公同賦詩讀騷痛飲良可師今朝美酒注深
爵明日殘花辭故枝仕宦京華得高會追歡勝景皆恩私
別後星河望渺渺將離贈遠遙相思更餘千載悲秋淚漆
髮丹顴非曩時

憩半山亭

山嶺行人少孤僧獨靜居雲中炊火鬱竹裏出煙虛松老
惟藏鼠泉寒欲凍魚寺門猶五里且憩半山廬

送宋荔裳少參之任秦州

臘雪街亭滿何時到鞏昌關山尊底月斧鉞帳前霜閣暝
調鸚鵡花濃隱麝香出門憐舊伴白首尙爲郎

送胡循蜚由衡州左遷商邱丞

燕山積雪高三尺九月嚴霜天地坼與君長揖走風塵同
是西吳羈旅客獨憐坎珂仕宦途折腰偏向府中趨豪心
俠骨委成敗場中游戲呼臬廬來時衣帶瀟湘雨南國縱
橫亂豺虎探穴初耽衡嶽深覽竒更喜梁園古睢陽城邊
驅馬行才人遷謫易知名酒酣日落哀箏急淚溼青衫空
復情

華嚴菴小憩有懷南還諸子

菜陌瓜畦取徑斜空林宿鳥隱袈裟風敲霜壓西鄰竹茜
柴梔勻九日花庾信似悲搖落早阮公休慟道途賒江東
已報收諸郡浪息銀河好汎槎

柬同年吳方漣侍御

長安暑退雨來初，隔巷清秋苦索居。
執戟長飢愁曼倩，杜門病渴卧相如。
十年兄弟干戈後，萬里生涯瘴癘餘。
正可從容謀諫草，治安惟待賈生書。

別梅杓司兼寄施愚山

吳苑煨鑪厯已殘，幽人時戴竹皮冠。
龜茲不改歌聲妙，牛斗猶餘劍氣寒。
金粉銷沈空響屨，溪山平遠待憑欄。
回看京洛賓朋盛，公讌詩成敵建安。

穀雨後二日過鏡檻小憩

春深喬木綠陰齊，北舍南村祇隔溪。
孤艇隨風獨來往，楊花撲過小橋西。

終南結茅歌贈本爾上人

薄游偶傍禪牀宿，靜夜同燃佛前燭。
天晴古院訪三支，凍

筆聯吟閣下詩拂蠹翻經爲小住探奇卻愛山深處萬里
遙從閩嶠來一筇還向關西去眼前希見荔枝丹常有紅
泉碧樹看茅屋蒼涼人跡絕可耐陰崖六月寒永謝塵喧
樂長往商州風色偏蕭爽鸚鵡時依絕壁嘯王孫羣偵懸
藤上坐來日月石上生千仞終南冰雪清青鞋布襪計亦
得人間馳逐空浮名

孫鍾元先生北還夜話甯境僧舍

衛源留兼旬驅車卽云邁遲我一日行觀止乃大快移鐙
視鬚眉耿耿照孤介俠分燕趙風學疏濂洛派嘉遯獲安
貞筮得天山卦追遡萬历年親歷幾興壞屈指數難盡披
髮見何怪所著宜名山流傳深足戒梗概紹劉楊
元劉靜
楊
椒山皆
容城人
浮名鄙草芥靜觀去矜心龐公牀下拜

初冬同半千問旭靜鑑過訪掃葉清涼寺山樓

冶城幽寺卽寒村黃葉堆來晝閉門疏竹影搖通水色垂
柑實老綻霜痕天浮吳楚看明滅月滿江山自吐吞更與
虎頭添畫本長空帆影霧中昏

錢牧齋先生輓詞

入世雄心老漸灰昔年鉤黨競風雷俊廚何救東京沒刁
顧還從北渡來天爲文章留末路人推碑版冠羣材先朝
實錄尤淹貫多少微辭紀定哀

送孫無言歸黃山歌兼示王西樵彭鴻叟

甲辰十月游舊京蕭條旅宿聞爾名方冀惻款爲陳說慷
慨結客樓君卿長貧不妨用我法久客毋乃非人情故鄉
本在黃山下老松奇石形堪詫茅堂豁開無纖埃末俗塵

機此焉謝誰寫三十二奇峯長歌短調風人風健筆摩空
洵奇絕驪珠出袖光熊熊少嬉草市鄉遙對溪南口山徑
藍輿古渡船止壓歸囊詩萬首謁來同泛西湖水每憶黃
山如夢裏酒樓長醉杜樊川丹爐休覓容城子勸爾遲行
姑且留仍教大隱栖邗溝山中故人達書問赤箭黃精猶
可求

周量賦詩贈行依來韻留別

每食無魚歎此身棲遲邱隴謝風塵秋垂野菊攜書卷曉
上寒潮拂釣綸伍相祠前多病客荆卿壚畔和歌人著書
忘老松鱗蛻醉倚瓜廬岸角巾

王士祿字子底一字西樵山東新城人順治壬辰進士

官吏部員外郎有考功集

詩話西樵爲漁洋長兄沈歸愚謂漁洋詩學所自出
漁洋序其詩謂出新意於法度之中寄妙理於豪放
之外引其過襄陽詩云魚鳥雲沙見楚天清詩句句
果堪傳一從時世矜高唱誰識襄陽孟浩然指爲微
旨所在又謂刻集時佳句佚者頗多舉其濰縣道中
云人煙通下密橋路繞東丹感興云大人有賦言仙
意內景何方駐聖胎此類尙夥蓋一門詩學固屬沈
瀛至其才力雄深伯仲之間各有面目殆非漁洋所
能掩

寄季弟貽上

離居足憂端忽忽苦無憚
睽違感至今提攜念在昔執手
既未卜所願眠食適頃者家郵至
言汝資藥石置書坐沈吟
茫茫中懷迫移時取竟讀書言頗詳
覈比當發使時汝體業已澤
恐爲虛見慰此意苦難逆
叢雜緘牘末最後得手蹟
把讀語良符筆勢更奕奕
終苦魂夢滑連宵役精魄
翹首望南雲安得雙羽翮
送我置汝傍覩汝肥與瘠

次貽上用坡公東府雨中別子由韻見寄

客秋自汴上省觀維

揚貽上被檄將有秣陵之行僅對牀一宿乃與同舟至真州南郭而別比余北還貽上尚未畢役歸也今年春貽上用坡公東府別子由韻作詩見寄讀之淒然未及和答比在幽繫言念聚散感慨不能已已遂次韻寄之并示禮吉叔子

白沙洲畔樹年時記別汝歲晚江城陰風淒如欲雨去當

南雁時不待雁同歸離居復多難徒爾思前期歎息重歎

息兄弟等過客幾番約連牀歛若湘靈瑟秋來雁又飛題

詩附爾行晨風零雨外脈脈十年情

長平坑歌

虎狼之秦胡不仁銳頭小兒服振振劫灰更促括也將一

戰趙壘成埃塵白骨嶽積四十萬至今此地無青春丹河

水繞發鳩麓指點當年趙兵血土人往往坑旁耕拾得殘

戈或斷鏃鏃頭長以寸戈頭長以尺持將磨向丹河沙古
血猶腥土花赤省冤谷接武安臺南來遺跡仍崔嵬應共
鬪黠山下月夜深同對鬼燐哀

飛龍宮行

唐元宗爲潞州別駕
時龍潛舊邸今府治

臨淄此地曾潛龍倜儻頗有文皇風夜半入宮星如雨乾
坤再闢成奇功十有一祀帝業崇耀武太原臨河東中經
上黨鸞雍雍凝笳清蹕臨舊宮眷言顧之擬沛豐問疾賜
酺歡無終易以嘉號志所從更聞金橋謠兒童羊頭山翠
當朝宗勒兵三十萬旌旗千里重陳吳作繪燕公頌潞州
別駕堪豪雄乾符坤珍一十九并與茲邸傳無窮龍漉降
庭蛇起陸龍入蜀江作魚服雨黑延秋烏語哀月明南內
絃聲促阿鞞凶狡阿環驕何術豢龍同豢犢漁陽塵壓沈

香欄勿乃遙爲故宮戮噫吁嘻飛龍宮已寒煙三郎魂魄
何來還

詔罷高麗貢鷹歌

真人御極臨八荒百蠻九譯皆享王西旅之葵越裳雉貢
物各各因其方海東俊鳥好毛質鐵爪金眸猛無匹九都
作貢來天家特受鞴錠佐罟畢晾鷹臺上秋天高刈蘭驅
獸行蒐苗羽騎驂驪翠華至星旃雲罕紛周遭蒙鵬射熊
未足羨跋犀殪兕勞遮邀是時摘條試一縱萬人昂首瞻
青霄飛鳥狡兔失巢窟委身灑血填君庖至尊往往動顏
色玉蚪迴轡鳴蕭蕭柔遠猶然勤睿旨詔罷奇毛自今始
行葦兼存踐履慈芒葭漫賦春田美聖神舉動殊尋常此
事悠悠古誰比君不見蚪髯天子英雄人佳鶴猶遣懷中

死

八月十五夜

把酒邀明月清光徧薜蘿芙蓉秋水寂叢桂小山多一雁
歸湘楚繁星點絳河虛堂絃索靜獨和越人歌

憶萊子雜詩

時復尋春郭煙光縱目寬山姿濃大澤潮勢汨三韓小立
拋藤杖微吟側籜冠一樽石凍酒未厭海風寒

禾中作

江城還櫓李望古一跣廚老寺裴休宅春沙范蠡湖遠煙
明渚烏斜日冷檣烏太息東流水年年浸綠蕪

故明景帝陵

景皇決策仗于公定變支危社稷功南內已殊淵聖沒絕

溝何意魯昭同玉魚殺禮虛幽寢以王蒼鼠驚人竄敗叢
莫向空山紛感慨十三陵樹各悲風

上黨

雄藩上黨古今名形勝居然未易京南睨河山全覺下宵
看星漢只疑平義陽千載仍祠廟夾寨當年劇戰爭足底
黑雲天下脊幾朝車馬赤霄行

贈張箕山學士

銅龍曉色破層陰羨爾批鱗意獨深言聽便爲天下福計
違不負一生心他時烏奕看青史此日輝光燭翰林我亦
握蘭東省客浮沈徒愧二毛侵

賦得丹鳳城南秋夜長

丹鳳城南秋夜長關河寒近落微霜那須錦字論長恨自

有清礎教斷腸
破衲沙頭鴻欲去
拂雲堆上草初黃
傷心不及城邊月
猶照盧家玳瑁梁

庭梅

索笑憐窗曉
流光照砌春
那須江上見
宛似弄珠人

石門縣

落日石門路
語溪明夕波
女牆纔幾尺
一半入藤蘿

絕句

記得佳辰弔汨羅
客懷長晝費銷磨
朅來夕院愁如洗
爲聽蘭娘一曲歌

題龔半千畫爲周櫟園侍郎

石門積雨黯層巒
鴉路蒼蒼萬木攢
爲憶秋風吹老屋
孤情著意寫荒寒

王士禛字禮吉山東新城人監生有十笏草堂集抱山

集選

王漁洋曰余兄弟少讀書東堂皆好為詩先後成進士去獨仲兄家食以老有詩數百篇暇乃擇三之一刻之曰抱山者兄少日所居堂因以自名其詩蓋取諸孟東野句云詩話五言小絕導源盛唐摹形者病神合者難順康之問猶沿古製項邪羣從特標雅音觀漁洋選仲氏詩斯體為工殆與微雨過青山蕭條秋雨夕諸篇同一得髓也七絕好作俳體則遠遜矣

登望京樓

巍巍樓閣倚雲隈
占斷春風百尺臺
東去錦帆淇水合
西來爽氣太行開
如新棖桷存丹雘
極目煙霞點綠苔
莫上望京樓
望遠黍離麥秀使人哀

微雲移時月出

乍散還乍聚
疑煙復疑水
清光出雲中
皎皎如初洗

南池

勞勞任城道渺渺近南池亦欲吟秋水爲慚老杜詩

清涼洞

始皇曾避暑四閣望依然欲縱登臨目空愁雨雪天

松

老幹化蚪龍賞心惟勝友年來鬚鬢斑宜伴支離叟

百泉

瑟彼百泉流洋洋入淇汜風動碧波紋荷花香出水

蘇門山

遙望蘇門山隱磷多幽致青林間白雲晚照含蒼翠

嘯臺

長嘯人已邈餘音振林麓世事笑莫談嵇阮有高躅

德州河上口號

曲岸臨大河風帆日千里迢遞遠鄉人離心託江水
思鄉與懷古望遠臨江樓長歌指飛鳥風起蘆花秋

王孫蔚字茂衍臨潼人順治壬辰進士歷官福建布政

使湖廣提學道僉事有輶香集

詩話茂衍舉於鄉初已定元後改置第二及延對在
陝西為第一又不待館選自刑部郎出守府擢閩藩
復左授川東兵備尋視學湖廣卒於官茂衍孝友
端亮詩格高音雅與李天生王幼華在伯仲間

秋江吟

輕舟如馮虛江碧峯影倒寥宇無塵埃晴光動菱藻幸因
歸櫂閒歷此湖山好寓眺日夕殊佳景恣幽討向暮下江
城霜碁處處擣時序已如此我顏得無老楚山風雨來一
夜白秋草

與友人山中夜坐

偶然緣水岸落日見幽棲
野暮煙藏寺山空月過溪
結籬松磴下借樹草堂低
明早如無事披雲更杖藜

與石徽音飲酒

閱世亦云盡如君未易遭
交情今管鮑俠氣古荆高
霜落鐙前劍花飛夢後毫
肯拚傾倒與不惜鷓鴣袍

將至應山

前山將入楚秣馬識曾游
風土漁樵舊江村父老留
苔沈宋玉宅日照鄂王樓
眼底飛鴻在還須鄭俠謀

初發里門留別

年年高卧擬柴桑何事驪歌動別觴
鷄肋浮名勞去就鹿冠微願惜行藏
征鞞漸欲登山路迴首何能忘草堂
作客

更從今日始二陵秋色正蒼茫

賦贈盧司李

薊門相對故人情同拜新綸事遠征明月一輪巴子國秋
風匹馬鄂王城羞言桑孔多心計舊識于張有盛名他日
江天遙憶處黃磯白渚楚雲平

秋赴長安途次晉中雜興

行人去去復青山策馬西風了未閒碧草難尋綿上隴白
雲何處雁門關三更曉角來霜裏一片秋聲在樹間此際
蕭森愁欲起不緣客路亦潛潛

江行雜感

纔離越嶺又吳湄寥落江湖憶故居感憤千秋鸚鵡賦雅
騷一代鷓鴣詩籬栽黃菊知今是路入桃花自古疑乘興

莫停明月權
朝川山色待王維

芙蓉山色有無間
煙權蘆花千里還
遠澗寒聲移晚樹
晴江落照上秋山
逢人盡說風塵苦
出世方知雲水閒
昨夜終南來夢裏
宛然三徑扣松關

早發峽石驛

西巖馬首向層霄
秋樹平明煙未消
寂寂空亭人不見
霜吹紅葉過山橋

湘行絕句

暮歷湖雲淡帶煙
漁燈明滅大隄邊
風聲夜半幽篁裏
疑是湘靈廿五絃

萬里晴江落照遲
琵琶峯下小舟移
楓林日暮寒鴉影
飛入長沙賈傅祠

程可則字周量號湟溱又號石隴南海人順治壬辰會

試第一歷官桂林知府有海日堂集

詩話周量王辰試南宮冠多士乃以磨勘不得與殿
試越十年試授中書歷戶兵兩曹出守桂林當官敏
幹有聲於時沈酣經史一發之於詩歸愚稱其詩俊
偉騰踔聲光熊熊品在公賦玉刺鈍翁諸公之右

舟晚

迴舟轉清澳落日照前岑水闊一帆遠雲歸衆壑陰蟲聲
喧別浦人語靜空林寂寞河干客悠悠行路心

送徐庾清錢柏園歸越

良會竟難永歲寒人盡歸誰憐故鄉子獨采南山薇把酒
不終夕浩歌徒攬衣無能挽舟楫惻惻對斜暉

虔州

章江迴合女牆低不見行人但鳥隰往日聊城誰射矢至

今函谷未封泥風吹敗葉沈沙礫日落前營動鼓鼙欲向
鬱孤臺上望亂雲含雨草萋萋

度雙脾峽

虔州南上路巘岼忽到雙脾水氣昏帆向夕陽爭鳥道天
留孤塹峙江門沿澗百折灘聲急明滅千峯樹影繁谷口
似聞雞犬喚人家疑是武陵源

送魏子存司理成都

誰說蠶叢不易行春風三月馬蹏輕銅梁舊枕秦山險玉
壘新連楚塞平芳草綠齊過漢水杜鵑紅盡到綿城知君
篋底多詞賦論蜀文應似長卿

題趙承旨擊鞠圖

至元一幅鵝溪絹四尺不滿三尺餘翰林承旨頗好事繪

取擊鞠爲斯圖不知王者是何代紫稜白面蒼虬鬚手提
青絲綠玉策據鞍顧盼神睢于左右布列數猛士銜竿挾
杖紛騎驢一球委地不得撥四面擊者羣爭趨驢蹏驕蹏
勢欲動蹠蹠騰還精神殊我聞軒轅習武士沙蟲猿鶴皆
前驅一擊能令力牧怒蚩尤涿鹿功煌如吁嗟王孫際龍
戰繪此毋乃含歛歔方今海寓盡混一虎皮蓋藏金僕姑
雲門旣奏泰階平縱有筑鞠非兵符此圖不用示天下只
合簡冊供清娛銜竿挾策胡爲乎

曉起與鄜無傲作

長安四月雨霖霖生微寒晨興出簾閣稍覺衣裳單鬱鬱
庭中槐淺綠浮林端好鳥鳴相聞彷彿棲巖巒不見夏雲
熱甯知春色闌賴有同心人把臂延清歡回首思故鄉衆

卉萋以繁黃梅摘方熟朱荔誰當餐嘉序長不歸誰能假
羽翰

吳漁山爲余做營邱早雪圖

漁山山人不出山榻來燕市仍鍵關含毫撥墨自怡悅爲
我披豁開心顏鵝溪一幅營邱似積素凝寒半江水殘條
拂地凍欲僵有客孤舟去如駛蘆葉蕭蕭風亂飛千山寒
色兼斜暉此翁掉頭頗解事天地已閉人當歸不然訪戴
意亦適歲寒蘭芷應須惜多謝山人冰雪心挂帆好向羅
浮宅

沈荃字貞蕤號繹堂江南華亭人順治壬辰一甲三名

進士授編修官至禮部侍郎謚文恪有充齋集

詩話宣德中雲間沈民則民望兩學士以書法得名
世稱大小沈學士繹堂爲小沈學士裔亦以書法受

知於景陵碑版流傳後先輝映
詩春容安雅盛世之音泯泯如也

曉渡揚子

曙色初開揚子渡
片帆遙挂海門西
橫江曉霧千峯失
隔岸寒雲萬堞齊
短棹蒼茫漁浦外
長天縹緲雁行低
中流倚櫂頻回首
吳楚山川極望迷

同徐甯菴憲副席竺來太守滎河秋望

西風獵獵動寒波
滎水相逢一浩歌
廣武秋陰迷舊壘
太行晴色下長河
黃蒿斷岸奔流急
野寺疏楊夕照多
蕭瑟那堪風景異
高天極目雁行過

清源懷舊

晨雞啓重闔
城柝亦未綴
解纜乘細流
輕橈向曉發
淒淒下微霜
皎皎鑒寒月
惆悵問前途
鬱紆感逝節
回首溯舊

知音微已滅沒眷德思偏長懷分情難歇虛期萬里風徒
愧中流楫十年過西州悽愴心如結

送張簣山學士歸廬陵

襆被蕭蕭出鳳城雲霄極目重含情片言豈詔回天力三
宿仍辭去國名聖德優容昭日月臣心愚樸本平生曲江
風度應相憶莫戀空山猿鶴盟

耿介字介石號逸庵登封人順治壬辰進士改庶吉士

授檢討歷官少詹事有敬恕堂存稟

詩話逸庵自詞林出巡閱贛後移畿輔所至皆有惠
於民乞歸養母躬請蘇門受業於夏峯遂以昌明正
學為己任湯文正長春官詔兼詹事薦起逸庵為佐
逸庵見道不能行復謝病還里與門弟子講學無忝
容於色登其堂者如坐春風中
詩亦和平溫雅為有德之言

八月十六夜宴盱江樓得白字

江城霽夕暉層閣凌百尺冠蓋會羣公對此秋月白豈敢
耽歡娛良時亦足惜下見江水深澄涵一天碧細火通漁
艇連檣聚商舶潛鱗吹波瀾宿鷺依沙磧爲政無煩苛民
物各自適冉冉江上楓青青嶺頭柏願將孤月輪皎潔比
心迹

都門送周亦大同年

曙色照行旌鳴鞭出鳳城三年風雨意兩地別離情露白
秋江遠煙消楓樹晴奇書中祕在須早侍承明

由南平至閩

茶洋六月放舟還水竹千重咫尺間龍抱石根翻急瀨天
憑溪力割青山人煙幾處聞新哭柳色經年憶舊攀爭似
澄江垂釣叟一竿無語伴鷗閒

嵩陽書院送寶敏修先生

古道於今歎式微
臨歧執手更依依
依山靈似有留行意
一片停雲人不飛

笄重光字在辛號
江上丹徒人順治壬辰進士官御史

有江上集

詩話江上劫明珠余國柱直聲震海內棄官而隱或言爲隴中道士工畫爲世所重詩自然清雋有句云只因鳴遂斤不道直難容可見其懷抱

飲張湘曉吏部鶴林別業

讀書曾愛杜鵑樓
霜葉紅時坐未休
別後煙霞常入夢
重來松菊正逢秋
欲尋老衲精藍改
話到青山白髮羞
好是結茅鄰仲蔚
不教城市隔林邱

山中雜詠

白髮驚時變青山見鳥飛暑隨桐葉減秋向薜蘿歸細草
侵芒屨新涼到葛衣自憐垂老日方悟昔年非

舟泊河干

山雨懸春樹江春入郡樓人家依岸轉河水抱城流自信
千時拙誰含作賦愁煙波時極目吾意在滄洲

答宋中丞收仲

憶昔宦游日匡廬愧使車歸來三十載未致一行書清興
因貧減顛名爲病除多公持節鉞猶及訪閒居

偶題

銀箏玉柱拂晴霞紅燭金尊照鬢鴉不是潯陽江上客莫
將雙淚落琵琶

楊素蘊字筠澗號退庵宜君人順治壬辰進士官至湖

北巡撫

詩話筠涓初令東明招撫流亡在縣三年增至萬餘戶舉卓異入爲御史糾平西驕悍謂當防微杜漸外遷川北道平西辨前疏坐罷歸及平西變作復薦授鄭襄道累擢至專圻自安徽移湖北值年饑疏請蠲賑時已病亟乞休吏議責以不親勘災坐奪職蓋不知其實病未幾卽下世

山居

高秋孤杖倚雲間坐看溪光卧看山白雪風翻驚疊浪青苔雨溼出層斑羣歸倦鳥飛飛急對浴輕鷗泛泛閒欵乃數聲天欲暮漁舟輕帶夕陽還

飛樓縹緲枕河湄繞屋羣峯列嶂隨雨脚每從晴外見灘喧翻與靜中宜稅完胥吏甯過舍野放雞豚偶到籬不學武陵深避世漁舟停櫂莫相疑

張永祺字爾成大興籍宜興人順治壬辰一甲二名進

士授編脩厯官大理寺少卿有金灘倡和詩

詩話爾成嘗與施愚山王漁洋同官倡和然非其匹也昌黎論文取文從字順詩取妥貼排界言從順妥貼之難也金趙閑閑論七律謂非讀詩三千首功力深至不能圓轉如意爾成諸體詩於押韻選言間有未盡妥貼之處

送胡存人南歸

握手談今夕離情已黯然師恩深自責交態畏人憐別酒風前路孤吟日暮天停鞭聊極目江水迴浮煙

送爾執北歸後悵然有感

鄉關攬轡客心驚薄暮空林倦鳥鳴婚嫁向平雙鬢改酒棋謝傅一身輕桑乾雪映千山曉易水霜流萬壑清話到微醺官舍後膝前兒女倍含情

和釋堂送顧菴南歸原韻

僧房長夏反離騷燕市狂歌飲濁醪野水沙鷗迎畫舫澄
嵐翠黛識宮袍思歸媿我荒三徑頌酒知君藐二豪到日
攜筇清興適白雲紅樹兩峯高

金灘賦贈邵浚玉學憲

河畔春風解纜初故人相向漫欵歔握中十部名山業篋
裏三年秀水書地近揚雄時問字途臨阮籍一迴車桃花
水繞漳河去尺素東來寄鯉魚

丁思孔字景行漢軍旗人順治壬辰進士改庶吉士授
編修官至雲貴總督

題畫壁和毛秋岑韻

秋水蒹葭闊孤舟自往還好音酬去雁清響答空山垂釣
煙波裏言懷杯酒間幾人有清趣心與境俱閒

項景襄字眉山秀水人順治乙未進士官至兵部侍郎
南屏

蕩艇入南山晴湖淨如拭繫纜枯樹根寒煙生微白偃卧
周山阿腳步層巖隙方丈出松巔亭亭高百尺入門逢老
僧塵纓頓若失說法水月心妙香浮廣澤落花滿空林披
雲坐磐石置身在霄漢庶以慰營魄安得常如此元言共
朝夕月出竟忘歸零露沾衣溼

題畫

閒來結得小茅亭但識煙雲月露形
歷日不書藤葉紙年年只記柳條青

張可前字箸漢江陵人順治壬辰進士官至兵部侍郎
有宛在軒詩集

新昌縣寄朱啟宇

負郭三家市窺城萬木村水春喧雨急山燒入雲昏露草
蛇盤徑風林虎嘯門何時荒僻地歸與故人論

傅感丁字兩臣號約齋錢塘人順治壬辰進士官至副
都御史有舒嘯軒集

登海湧峯

昔聞虎卧此高邱今日登臨最上頭近接靈巖惟片石遙
觀雪浪有孤舟消沈伯業同煙草寂寞禪心視水漚劍窟
泉飛石梁北聲隨香梵幾時休

郭棻字芝仙號快園清苑人順治壬辰進士改庶吉士
歷官內閣學士有學源堂集

春暮張爾成捕卿招同李書雲余銓盧王北山三給

諫摩訶菴看杏花

破懶尋春遠招攜石竺間興高卽暇日地闕况禪關樹裏
千聲鳥尊前一帶山登樓憑眺遠不負此官閒
野曠春逾媚林煙綠一圍遠公容設酒曾點未成衣坐樹
鶯聲老蒸田水氣肥閒雲如有意故故傍人飛

劉木水由代州州貳擢守遼陽州

五馬原侯秩三韓况帝鄉風能清代郡才可問南陽海氣
榆關紫秋花鐵嶺黃三年屈指是粉署待含香

迎薰亭侍宴

太乙波明影碧霞斗牛星畔泛仙槎百壺湛露聖人酒十
里香風君子花蛺蝶過船吹芰粉鳩鵲出水帶菱芽銜杯
四望歡無極身在瀛洲第一槎

贈程穆倩山人

廿載懷君老始逢，辦香不枉爲南豐。縱談身世悲桑海，屈指知交歎雪鴻。酒國有人堪獨往，硯田無種與時窮。干旌早晚徵耆舊，莫掩邗江半畝宮。

嚴藕漁宮贊假歸無錫

瀟灑抽簪出鳳樓，春風人上木蘭舟。一編青史垂行橐，十載紅塵浣素裘。去日鶯花憐滿目，到時江雨漫回頭。長安老友無多在，走馬蘭臺尙滯留。

別曹秋岳夫子十稔偶于晉陽拜晤感而有賦

左官次第買歸航，回首青門已十霜。元鳥尙留龍馬塞，逐臣敢負芰荷裳。且將世事浮桑落，況有文詞動柏梁。爲憶
暑年環絳帳，幾何雙鬢已蒼蒼。

春日張永舒太學招同李湘北學士王北山給諫杜
子靜宮允張南溟比部雅集遯園次韻

正欲降愁部酒兵銜杯爲愛遯園名舌存未許談時事心
老纔知淡物情小鳥爭來高閣噪新花還向舊枝生灤魚
易釀皆鄉味不羨張翰蓴菜羹

劉山人游中州憑寄張上若同館

輶車憶下午橋莊痛飲醍醐月正霜白髮我猶歌偈仄青
山君已定行藏淦河春雨騏驎浴行塢秋煙薜荔香滿眼
干戈憑問訊金臺客老意蒼茫

余縉字仲紳號浣公諸暨人順治壬辰進士官御史有
大觀堂集

詩話浣公宰封邱奏最第一人諫垣以敢言稱其
齋居苦雨詩卽以民生爲念宜其出爲循吏也

曉起聞鐘

偶出聞晨鐘云自湖南寺南望不見湖惟見湖中樹渺渺
水石間因風時一度何當月明中汎舟尋湖嶼

北固山晚眺

石頭城東煙水空金鰲夜吸海底紅天吳嚙斷白玉虹渴
貌怒攫青芙蓉中流幻出妙高峯浮濤拍浪將奚從似欲
渡江隨六龍

癸丑夏日齋居苦雨

蠡城五月雨絲密溼雲壓檐黑如漆街頭到處水繞門路
上行人泥沒膝舟子艤岸如螭房兩月何曾脫蓑笠上年
秋漲淹禾苗農家比戶吞聲泣賣絲糶穀望今年誰道夏
霽甚疇昔一片洪濤浮太清天風未吹海已立麩麥方熟

盡生耳陂塘總決江湖一侵晨插秧水浸畦薄暮歸耕船
入室盎中粟罄婦兒嘵官吏催糧如火急賣男貼婦安足
悲時有冀黃當見恤

舟次山陽

燕將雛舞柳棉飛浪湧漁舫鱖正肥淮酒初濃梅雨暗吳
蠶方老柘風微農緣輸賦田疇薄官善征商估客稀惟有
野人無逋課市橋長載月明歸

王廷璧字崑良祥符人順治壬辰進士授刑部主事歷
官陝西涼莊兵備道按察司副使有聚遠樓詩集

秋日飲李相國園亭

山容全入畫老樹動秋香露葉螢光溼風巢鶴夢涼茶煙
生暗竹酒氣靄迴廊莫擬平泉侈廬鴻一草堂

邢臺

塵土彫殘客裏顏
馬頭隱約見雄關
草蒸溼綠長煎雨
雲插空青欲占山
流水遠通寒棘外
小橋孤卧野花灣
季龍宮殿知何處
惟見蒼苔點石斑

燕市有懷惟度魏子

時客楚南

酒散繁臺雁影單
十年客夢老漁竿
長鏡杜甫沿山斲
短鋏馮驩帶月彈
回首滄桑皮骨盡
傷心湖海鬢毛殘
傳來戰火三湘滿
何處梅花續舊歡

李昌祚字文孫一字來園號過廬漢陽人順治壬辰進士
歷官大理寺卿有真山人集

魯峯別王汾仲

搖落鄉心屬暮秋
王郎真合古人求
終宵對月燒茶竈
竟

日臨江上酒樓雁外山低黃葉路日邊帆去白蘋洲江流
漠漠天如水圖畫何曾盡別愁

劉必顯字微之號西水諸城人順治壬辰進士授行人
司行人厯官戶部員外郎

題槎河山莊亭壁

十年塵夢冷漁磯又向灘頭理釣絲久客乍歸鷗作伴短
牆半缺水爲籬月明松影窺窗際夜靜溪聲到枕時獨坐
悠然成大覺挑鐙拂壁一題詩

葉矯然字子肅號恩庵閩縣人順治壬辰進士授工部
主事改樂亭知縣有龍性堂詩集雁唳篇東溟集

山海關

神州鎖鑰古雄關鐵騎雲屯重此間一自六龍興朔漠頓

飛萬馬下燕山樓船瀚海滄波壯烽火邊城白晝閒多少
征人罷遠戍深閨幼婦莫愁顏

碧山銜照映邊牆匹馬臨關道路長中土哀鴻輕出塞南
冠屨雉泣投荒一城礎杵當秋急八月風雲匝地黃最是
居人間指點紅花十里幾迴腸

立夏日雨中集城西書院

鷓鴣逐子伯勞飛天淡雲濃夕照微勸汝東風一杯酒明
年春色早言歸

張潛字上若磁州人順治壬辰進士改庶吉士有讀書
堂詩草

寄殷宗山

烽煙不到地歲月任逍遙飲犢猶嫌水臨風欲棄瓢千峯

供杖履一代見漁樵應共巢居子雲根劇藥苗

張晉字康侯號戒菴狄道人順治壬辰進士官丹徒知

縣有黍谷秋舫一嘯薊門勞勞石芝稅雲諸集

詩話戒菴詩縱橫凌厲出入風騷少年成進士謁選
宋荔裳備兵秦中贈以詩曰才子半為吏如君方少
年一時驚綵筆百里聽朱絃雨雪關山道音書鴻雁
天梅花春信好寄我上陵篇葭菼露蒼蒼弓刀客子
裝秦風餘駟職漢使重星郎擊電徠天馬彈琴下鳳
凰定蒙宣室問災異說維桑旋令丹徒充鄉試同考
坐吏議年甫逾三十遽卒戒菴旁通
音律有琵琶十七變世猶傳其譜

秋望

家世崆峒山下居每因風雨念吾廬魚龍水落霜來後鳥
鼠秋高月上初慈母手中千里綫故人雲外數行書經年
未忍西南望知道青松久笑予

報國寺

勝地開金刹諸天近翠峯月高秋在塔雲冷晚留松往事
存題碣前朝剩賜鐘一聲煙外鶴落盡舊芙蓉

河上

步履向汀洲殘山望眼收雲歸藏晚堞柳斷出晴樓古寺
藤煙夕荒灘蓼水秋平沙看舊雁落日更生愁

春寒

寒雲帶小溪樹樹鎖煙低二月春將半孤村鶯未曉花牽
新水細山背夕陽迷莫恨湖光冷東風自不齊

楊端本字樹滋號函東潼關人順治壬辰進士官臨淄

知縣有潼水閣集

詩話函東生明季值歲饑兵起詩多憂時愍禍之言
其音促數其辭質直所謂亂世之音入國朝登第入

官詩亦漸
歸和雅

春暮

惜春春暮燕飛斜日坐園林玩物華井上舊垂金綫柳階
前新植玉蘭花逐貧不作揚雄賦解渴時烹陸羽茶何用
買山逃世外萬竿修竹自煙霞

憶曹禹疏

余家渭水南君家渭水北盈盈渭川水相望兩岸側君令
泰山西余客泰山東峩峩泰岱山巉巖橫其中昔望渭水
波今望泰山巔夜夜海邊月朝朝山外煙

秋聲

秋聲來何處竦聽情思怯四顧寂無聞微風生梧葉蕭颯
林木鳴萬籟音相接浙瀝數點雨雲澌山嵐浥作賦歐陽
子爽然秋意慊

湖暮

倚檻湖方暮山山橫翠飛水浮雙塔動樹擁亂雲歸鏡鼓
喧迴擢笙歌沸落暉鐘聲來遠寺隔岸響微微

顧亭林卜居華山

谷有圖南卧卜鄰古洞幽蓮開猶十丈松老自千秋捫蝨
應難識翔鴻未可求不須丹詔至野性白雲留

仙娥溪

川迴大壑雨冥冥十里嵯峨拱翠屏溪水桃花流不盡仙
娥山外數峯青

曹同統字能紹號容庵巢縣人順治壬辰進士授懷慶
推官歷官東昌同知有容庵詩集

中牟晚道

日落煙沙白，荒荒野色微。
村寒牛影瘦，天闊雁行稀。
謀騎衝風至，鋤農荷月歸。
此邦三異蹟，默爾念前徽。

陳維國字大治一字坦山武陵人順治壬辰進士官信

陽知縣有坦山山人集

詩話坦山孝於親寇至欲殺其父引頸求代寇兩釋之宰信陽有惠政乞歸平西之亂就常德試士徵起入山主試辭不就使封劍迫之視髮入山終不汗僞命卒年八十有六

客濠州別楊小陸

只此兩狂客，空山喧酒聲。
長年別好友，竟夕慰深觥。
松傲霜前色，梅孤雪裏情。
尊中無限意，明日是歸程。

桐城晤胡渚叟明府

一縣煙嵐合，山城吏似仙。
閒情飛鳥外，公事落花前。
偶和詞人句，頻酬酒客錢。
蕭疏誰得識，坐月靜鳴絃。

趙原字魯眉號長公萊陽人順治壬辰進士官萬年知縣有寒堂詩彙

晚泊天門山

孤舟逢日暮晚宿傍山青寒月三更出長江一帶明病中添客淚夢裏落潮聲何處棲飛鳥蕭蕭萬里情

戚藩字价人號蘧庵江陰人順治壬辰進士官安定知縣

靈隱寺

策杖行過舊虎林翠屏深繞萬松吟寺連滄海朝煙白塔入澄湖夕照陰猿父呼來都解頰牧童歌去已忘音喜逢支遁拈花示響答鳴泉處處心

晚晴移詩匯卷二十六終